



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

նոյեմբերի 2022 թվականի № -Ա  
ք. Երևան

**«ԷՆԵՐԳՈՏԵԽՆԻԿԱ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ  
ԸՆԿԵՐՈՒԹՅԱՆ ՎԱՐՉԱԿԱՆ ԲՈՂՈՔՆԵՐԸ ՄԵՐԺԵԼՈՒ ՄԱՍԻՆ**

Հաշվի առնելով, որ՝

ա. «ԷՆԵՐԳՈՏԵԽՆԻԿԱ» սահմանափակ պատասխանատվությամբ ընկերությունը (այսուհետ՝ Ընկերություն) Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով) ներկայացված 2022 թվականի սեպտեմբերի 1-ի №Է-044 և սեպտեմբերի 5-ի №-046 գրություններով բողոքարկել է՝

1) Հանձնաժողովի 2022 թվականի հուլիսի 6-ի №278-Ա որոշումը (այսուհետ՝ Որոշում)՝ խնդրելով չեղարկել այն և ըստ էության քննարկել 2022 թվականի փետրվարի 10-ի №Է-011 գրությամբ ներկայացված դիմում-բողոքը (այսուհետ՝ Դիմում): Որպես պահանջի հիմնավորում մատնանշելով «Վարչարարության հիմունքների և վարչական վարույթի մասին» օրենքի (այսուհետ՝ Օրենք) 5-րդ հոդվածը, 43-րդ հոդվածի 3-րդ մասը, 47-րդ հոդվածի 2-րդ մասը, 72-րդ հոդվածը, 73-րդ հոդվածի 1-ին և 3-րդ մասերը՝ Ընկերությունը պնդել է, որ Դիմումը համապատասխանում է Օրենքի 72-րդ հոդվածով սահմանված՝ վարչական բողոքին ներկայացվող պահանջներին և առկա չեն այն առանց քննության թողնելու հիմքեր,

2) «Հանձնաժողովի 2022 թվականի հուլիսի 7-ի №ՍԱ/34.3-Մ2-4/2224-2022 գրությամբ ամրագրված Հանձնաժողովի անգործությունը», մասնավորապես Ընկերությունը վերստին պնդել է Ընկերության 2022 թվականի ապրիլի 11-ի №Է-031 գրությամբ ներկայացված Ընկերության փոքր հիդրոէլեկտրակայանից առաքվող էլեկտրական էներգիայի գնման երաշխիքային ժամկետի հաշվարկման, ինչպես նաև Ընկերությանը տրամադրված ջրօգտագործման թույլտվությամբ սահմանված ջրաքանակների խնդրի մասին փաստարկները.

բ. նշված բողոքների առնչությամբ հարուցված և իրականացված վարույթի շրջանակում հաստատված է համարվել, որ՝

1) Որոշման և Հանձնաժողովի 2022 թվականի հուլիսի 7-ի N°ՍԱ/34.3-Մ2-4/2224-2022 գրության (այսուհետ՝ Գրություն, որը Ընկերության կողմից որակվել է որպես անգործություն) իրավաչափությունը բխում է հետևյալ իրավանորմերից.

- Օրենքի 71-րդ հոդվածի 1-ին մասի «ա» կետ, համաձայն որի՝ վարչական բողոքը կարող է բերվել վարչական ակտն ուժի մեջ մտնելու օրվանից 2 ամսվա ընթացքում.
- Օրենքի 72-րդ հոդված, համաձայն որի՝ բողոքը պետք է պարունակի՝

ա) այն վարչական մարմնի անվանումը, որին ներկայացվում է բողոքը.

բ) բողոք բերող ֆիզիկական անձի անունը, ազգանունը, նրա հասցեն, իսկ իրավաբանական անձի դեպքում՝ իրավաբանական անձի անվանումը, գտնվելու վայրը, նրա անունից բողոք բերող անձի անունը, ազգանունը և պաշտոնը.

գ) բողոքարկման առարկան.

դ) բողոք բերողի պահանջը.

ե) բողոքին կից ներկայացվող փաստաթղթերի ցանկը.

զ) բողոքը կազմելու տարին, ամիսը և ամսաթիվը.

է) բողոք բերող անձի ստորագրությունը, իրավաբանական անձի դեպքում՝ նրա անունից բողոք բերող անձի ստորագրությունը.

- Օրենքի 73-րդ հոդվածի 3-րդ մաս, համաձայն որի՝ բողոքի վերաբերյալ որոշում կայացնելիս բողոքը թողնվում է առանց քննարկման, եթե դա ներկայացված է Օրենքով սահմանված ժամկետը լրանալուց հետո, և ժամկետը բաց թողնելը Օրենքի 71-րդ հոդվածի 2-րդ մասով սահմանված կարգով, հարգելի չի ճանաչվել,
- «Հանրային ծառայությունները կարգավորող մարմնի մասին» օրենքի 28-րդ հոդվածի 4-րդ մաս, համաձայն որի՝ վարչական վարույթի շրջանակում կայացված՝ Հանձնաժողովի անհատական բնույթ կրող գրավոր որոշումներն ընդունման պահից երեք աշխատանքային օրվա ընթացքում հանձնվում են վարույթի մասնակիցներին.

2) Որոշումն ընդունվել է, իսկ Գրությունն ուղարկվել է օրենքներին ու գործող իրավակարգավորումներին համապատասխան, ուստի դրա վերանայման հիմքերը բացակայում են: Մասնավորապես, Ընկերության 2022 թվականի ապրիլի 11-ի N°Է-031 գրությամբ ներկայացված դիմում-բողոքը թողնվել է առանց քննության, քանի որ Ընկերությունը վարչական բողոքը ներկայացրել է օրենքով սահմանված ժամկետը լրանալուց հետո, մասնավորապես, Հանձնաժողովի 2021 թվականի դեկտեմբերի 29-ի N°479Ա որոշումն անբողոքարկելի է դարձել 2022 թվականի ապրիլի 1-ից, մինչդեռ Ընկերությունը դրա դեմ բողոքը Հանձնաժողով է ներկայացրել 2022 թվականի ապրիլի 11-

ին: Ինչ վերաբերում է Դիմումին, ապա այն չի կարող դիտվել վարչական բողոք, քանի որ չի համապատասխանում Օրենքի 72-րդ հոդվածով սահմանված պահանջներին, իսկ Օրենքի իմաստով Հանձնաժողովը 2021 թվականի դեկտեմբերի 29-ի №479Ա որոշման բողոքարկման գործընթաց կարող էր նախաձեռնել միայն Օրենքի պահանջներին համապատասխան վարչական բողոք ներկայացնելու դեպքում: Մասնավորապես, բողոքում ի թիվս այլնի, պետք է հստակ արտացոլվի բողոքաբերի պահանջը, այն է՝ լրիվ կամ մասնակի անվավեր ճանաչել որոշումը, փոփոխել այն, առոչինչ ճանաչել և այլն: Մինչդեռ, Ընկերությունը Դիմումում պարզապես նշել է, որ համաձայն չէ Ընկերությանը վերաբերող ձևակերպումներին և խնդրել է Հանձնաժողովի 2021 թվականի դեկտեմբերի 29-ի №479Ա որոշումը համարել իր կողմից բողոքարկված՝ առանց ըստ էության պահանջ նշելու: Գրության առնչությամբ հարկ է նշել, որ դրանով, հիմք ընդունելով «Հանրային ծառայությունները կարգավորող մարմնի մասին» օրենքի 28-րդ հոդվածի 4-րդ մասը, Ընկերությանն է ուղարկվել Որոշումը: Միաժամանակ, թեև բողոքը թողնվել է առանց քննության, և Հանձնաժողովը չի ունեցել որևէ պարտավորություն անդրադառնալու դրանում բարձրացված հարցերին, այնուամենայնիվ, նպատակ ունենալով Ընկերությանն առավել հասու դարձնել Հանձնաժողովի 2021 թվականի դեկտեմբերի 29-ի №479Ա որոշման ընդունման հիմնավորումները, մեկնաբանել է այն և տեղեկացրել, որ «Վեոլիա Զուր» փակ բաժնետիրական ընկերության կողմից «Զույգադըյուր» ջրատարից խմելու ջուրը դեպի Թուրքիա ուղղելու հանգամանքների, ինչպես նաև Ընկերությանը տրամադրված ջրօգտագործման թույլտվությամբ սահմանված և փաստացի ստացված ջրաքանակների տարբերության պատճառների ուսումնասիրությանն առնչվող խնդիրները դուրս են Հանձնաժողովի իրավասության շրջանակից: Իսկ Հանձնաժողովի կողմից անգործություն դրսևորելու առնչությամբ Ընկերության պնդումներն ընդհանրապես անհասկանալի են, քանզի Հանձնաժողովի կողմից հարցի առնչությամբ ձեռնարկվել են օրենսդրությամբ նախատեսված պատշաճ միջոցներ և որևէ անգործություն չի դրսևորվել: Անդրադառնալով Ընկերության փաստարկներին՝ հարկ է նշել, որ դրանք անհիմն են և առարկայազուրկ: Ընկերությունը, մատնանշելով մի շարք իրավանորմեր որևէ կերպ չի հիմնավորել Որոշման և Գրության օրենքին կամ որևէ այլ իրավական ակտին հակասելու հանգամանքը:

գ. Որոշման և Գրության փոփոխման կամ բեկանման՝ Օրենքի 77-րդ հոդվածով սահմանված հիմքերը բացակայում են, և

հիմք ընդունելով Օրենքի 76-րդ հոդվածը՝ Հանձնաժողովը **որոշում է.**

1. Մերժել Ընկերության 2022 թվականի սեպտեմբերի 1-ի №Է-044 և սեպտեմբերի 5-ի №-046 գրություններով Հանձնաժողով ներկայացված վարչական բողոքները:
2. Սույն որոշումը կարող է բողոքարկվել Հայաստանի Հանրապետության վարչական դատարան՝ ուժի մեջ մտնելու պահից երկամսյա ժամկետում:
3. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելուն հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝**

**Գ. ԲԱՂՐԱՄՅԱՆ**

ք. Երևան  
նոյեմբերի 2022թ.